



CORTE A ORDENA ARUBA BANK PA HABRI CUENTA PA BOCHINCHA



Diahuebs, 4 Februari 2021

AWEMainta

3

Corte a ordena Aruba Bank pa habri cuenta pa Bochincha

Corte a dicidi cu e demanda di Otmar Oduber y Bochincha Container Yard tin base pa cual a bin cu un decision unda ta ordena e banco pa coopera cu e dos partidonan aki. Manera por a scucha di loke a bin dilanti den Corte, ya caba tabatin un idea ki direccion e caso aki ta bay.

Aruba Bank tabata mantene su mes na su posicion di no kier habri e cuenta pa motibo cu Otmar Oduber ta bou di investigacion. Pero e splicacion y puntonan treci dor di abogado Kuster a duna resultado. Banco a bisa cu e tin e derecho pa habri un cuenta of no cu BCY y Otmar Oduber.

Esey Corte a bisa, e banco tin rason.

Pero e no por bay riba indicacionnan so y si e nenga di habri un cuenta basa riba indicacionnan, anto e ta actuando di un forma inhusto pa Bochincha. Pues e por nenga pa habri un cuenta solamente riba motibonan hopi pisa.

E miedo cu Aruba Bank a bisa cu nan tin pa dña nan reputacion debi cu Otmar Oduber ta bou investigacion pa su actuacion tempo e tabata Minister, no ta hustifica e decision di banco pa no habri e cuenta aki.

E banco por tin rason, si Oduber a wordo condena. E splicacion di banco cu e negoshi manera Bochincha ta

anda cu hopi placa efectivo cu nan no por controla, ta algo cu Corte no por compronde. Y a duna e ehempel cu tin negoshinan manera supermercado y otro negoshinan den Horeca tambe ta haya hopi placa cash y no ta kere cu banco a keda sin habri cuenta pa nan. Banda di esaki, no mester lubida cu aki na Aruba pago cu placa cash ta legal.

Resumiendo, e decision di Corte ta bisa cu prome cu 24 ora pasa despues di e sentencia, Aruba Bank mester coopera pa habri un cuenta pa BCY, sino nan ta core e riesgo di haya un boet di 2500 pa cada dia cu nan no cumpli.